

烈曰本欲與將軍共圖王霸之業者以此方寸之地也今失老母方寸亂矣無益于事請從此別遂詣曹操然終身未嘗爲操畫一策焉

魏

鍾繇字元常皓之曾孫嘗築臺於縣治南學書其上漢末舉孝廉除尚書郎陽陵令以疾去辟三府爲廷尉正黃門侍郎是時漢帝在西京李傕郭汜等亂長安與關東斷絕曹操領兗牧始遣使上書繇說傕汜等厚加答報由是曹操使命得通拜御史中丞遷僕

中尚書僕射並錄前功封東武亭侯魏國初建爲大理遷相國曹丕踐祚遷太尉時華歆王朗並先世名臣丕罷朝謂左右曰此三公者一代之偉人後世殆難繼矣明帝卽位遷太傅卒謚成侯

陳羣字長文紀子寔孫爲兒時寔奇之常語人曰此兒必興吾宗及長仕漢爲治書侍御史入魏擢御史中丞時曹操議復肉刑令曰安得通理君子達於古今者使平斯事乎昔陳鴻臚以爲死刑有可加於仁恩者正謂此也御史中丞能申其父之論乎羣反覆

極言肉刑之當復曹操深善羣言以軍事未罷故寢羣後轉爲侍中領丞相東西曹掾曹不在東宮深敬器焉及卽王位封昌武亭侯徙爲尚書制九品官人之法及踐祚遷尚書僕射拜鎮軍大將軍領中護軍錄尚書事明帝立封潁陰侯卒謚曰靖侯子泰嗣陳泰字玄伯羣子青龍中除散騎侍郎正始中徙遊擊將軍爲并州刺史加振威將軍使持節護國中郎將懷柔彝民甚有威惠京邑貴人多寄寶貨因泰市奴婢泰皆挂之於壁不發其封及徵爲尚書悉以還

之嘉平初代郭淮爲雍州刺史加奮威將軍適蜀大將軍姜維率衆侵逼諸郡泰與淮謀所以禦之已而解狄道之圍徵泰爲尚書右僕射典選舉加侍中光祿大夫轉爲左僕射泰前以功增邑二千六百戶賜子弟一人亭侯二人關內侯高貴鄉公之見殺也司馬昭會羣臣謀其故泰不至使其舅荀顛召之顛至告以可否泰曰世之說者以泰方於舅舅不如泰也子弟內外咸共逼之垂涕而入與司馬孚就帝尸於殿號泣盡哀昭謂泰曰立伯何以處我對曰誅賈充

少可以謝天下昭曰爲吾更思其次泰曰豈可使泰
復發後言遂毆血死追贈司空謚曰穆侯子恂嗣陳
氏自太丘長寔寔子鴻臚紀紀子司空羣羣子泰四
世於漢魏並有重名而德望有差時人爲之語曰公
慙卿卿慙長

晉

棗據字道彥長社人父叔禕魏鉅鹿太守據美容貌
善文詞弱冠辟大將軍府出爲山陽令有政績遷尚
書郎轉右丞賈充伐吳請爲從事中郎軍還徙黃門

侍郎黃州刺史太子中庶子太康中卒時年五十餘
所著詩賦論四十五首遇亂多亡子腆字元方亦
以文章顯永嘉中爲襄城太守弟嵩字臺產才藝尤
美爲太子中庶子散騎常侍

鍾雅字彥胄潁川長社人父羣公府掾早終雅少孤
好學有才志舉四行除汝陽令入爲著作郎東海王
越請爲叅軍遷尚書郎避亂東渡元帝以爲丞相記
室叅軍遷臨淮內史振威將軍頃之徵拜散騎侍郎
轉尚書右丞再轉北軍中候大將軍王敦請爲從事

中郎補宣城內史錢鳳作逆加廣武將軍率衆屯青
弋時廣德縣人周玘爲鳳起兵攻雅雅據涇縣收合
士庶討玘斬之鳳平徵拜尚書左丞明帝崩遷御史
中丞時國喪未期而尚書梅陶私奏女妓雅劾奏陶
無大臣忠慕之節請加放黜直法繩違百寮皆憚之
北中郎將劉遐卒部曲作亂詔郭默討之以雅監征
討諸軍事事平拜驍騎將軍蘇峻之難詔爲前鋒領
精勇千人以距峻雅以兵少不敢擊退還拜侍中尋
王誦敗績雅與劉超並侍衛天子或謂雅曰見可而

進知難而退古之道也君性亮直必不容於寇讐何不隨時之宜而坐待其斃耶雅曰國亂不能匡君危不能濟各遜遁以求免吾懼董狐執簡而至矣庾亮臨行謂雅曰後事深以相委雅曰棟折榱崩誰之咎也亮曰今日之事不容復言與卿共期克復之效耳雅曰想足下不愧荀林父耳及峻逼遷車駕幸石頭雅超流涕步從明年並爲所害賊平追贈光祿勳其後以家貧詔賜布帛百匹子誕位至中軍叅軍早卒韓伯字康伯幼聰慧及長清和有思理留心文藝鼻

殷浩稱之曰康伯能自標置居然出羣之器潁川和嶠名重一時少所推服常稱伯及王坦之曰思理倫和我敬韓康伯志力疆正吾愧王文度自此以還吾皆百之矣簡文帝居藩引爲談客自司徒左曹屬轉撫軍掾中書郎散騎常侍豫章太守入爲侍中陳郡周總爲謝安主簿居喪哀感鄰里尚莊老脫落名教伯領中正不通總議曰拜下之敬猶違衆從禮情理之極不宜以此爲通時人憚焉轉丹陽尹吏部尚書領軍將軍卒贈太常子增官至衡陽太守

南北朝

鍾嶸字仲偉晉侍中雅七世孫父蹈齊中軍叅軍嶸與兄岍弟嶼並好學有思理建武初爲南康王侍郎時齊明帝躬親細務嶸上書諫上謂顧嵩曰鍾嶸何人欲斷朕機務答曰嶸雖位末名卑而所言或有可採上不顧而言他遷晉安王記室

唐

王求禮長社人武后時爲監察御史時契丹寇河北詔武懿宗禦之懦不進賊掠數州去懿宗乃條華人

爲賊誑誤者數百族請誅之求禮奏曰誑誤之人乃
城不完固爲賊所脅非素持叛心也懿宗擁兵十萬
退保城邑今乃移禍無辜之人請斬懿宗以謝河北
懿宗懼後盡赦其人求禮以剛正故官不達神龍初
終衛王府參軍

宋

焦繼勲字成績少讀書有大志嘗謂人曰大丈夫當
立功異域取萬戶侯豈徒孜孜事筆硯哉遂棄其業
游三晉間爲輕俠以飲博爲務歷事晉漢周以戰功

拜彰武軍節度使後入宋乾德中召爲右金吾衛上將軍時向珙爲西京留守多飲燕不省府事羣盜白日入都市劫賸珙被酒不出捕逐太祖選繼勳代之月餘羣盜斂跡京城肅然時見褒賞以爲彰德軍節度使仍知留府事太平興國三年卒贈太尉繼勳涉獵史傳頗達治道所至有善政然性吝嗇多省公府用度時論少之子守節

焦守節字秉植初補左班殿直選爲江淮南路採訪使還奏稱旨李順餘黨擾西川命與上官正討平之

高溪州蠻內寇又命往圖方畧守節言山川回險非
我師之利詔許招納咸平中置江淮南荆湖路兵馬
都監首被選擢又討施夔州叛蠻以大義諭其酋長
皆悔過內附因爲之畫界定約還遷閣門通事舍人
已而奉使契丹館伴丁求說指遠山謂曰此黃龍府
也守節應聲曰燕然山距此幾許求說慙服久之遷
皇城副使數請補外歷知襄鄧汝三州遷四方館使
以右神武大將軍致仕卒

何中立字公南幼警邁舉進士授大理評事仁宗時

直學士知慶州有卒告大校受贓者中
直曰是必挾他怨也鞭卒竄之或曰貸姦可乎中立
曰部曲得持長短以制其上則人不自安矣議者謂
其識大體後卒家無餘資有文集二十卷論思集十
卷行於世

明

張蓋臣字元進天性穎異過目成誦九歲能文東里
高鳳溪一見奇之稱爲破腹才弱冠遊泮與新鄭高
存菴伯仲襄城姚文軒穎上邢後峨禹郡連嵩陽大

梁曹少川同邑宋蘭皋爲友時號中原八俊嵩陽不
祿爲撫其兩孤以女妻其長君且受業焉已而相繼
成進士其篤於交情生死弗渝也不事生產嘗却徵

藩之聘文章氣節推重一時方伯內江高公令二子

師事之時憲長太原李公少參江西余公子悉與焉

已酉舉鄉試第一人直指知爲藩臬西席避嫌不果

壬子列賢書及赴公車海內人譽如高文襄王荆石

秦鳴雷輩無論識與不識莫不交歡時肅宗重玄教

一夕命下取對句百聯詞臣屬公筆頃刻立就內寓

親賢遠奸以開太平景運等句分宜聞而惡之故屢

上春官不第以親老家貧就陽城令將之任高文襄

送之曰君蘊經濟才願少待公正色曰輔臣當爲國

薦賢不得私一故人抵陽城以節愛爲治頗著政聲

甫一載疾作自嘆曰與其淮陽臥治孰若秋風命駕

乎百姓遮留不得迄今尸祝焉旣歸蕭然三徑菽水

承歡暇則徜徉詩酒而已生平著作甚富有羣書選

粹兩漢博議詩文應酬集真草法書行世年六十卒

張彥字子美號西塘舉人昂之孫也性廉介不阿處

長壽縣志 卷之五 二
鄉里與物無競少孤賴祖母養育成立篤學力行以
儒者自命十五補邑庠就鄉試未畢聞祖母病同遊
者勸之峻事乃曰有祖母則布蔬亦榮無祖母則鼎
鍾不樂卽戴星馳歸祖母病革中夜禱天願以身代
及卒哀毀成疾有司廉其狀以孝聞篤志好學爲諸
儒望遠近負笈從遊者百餘人如東魯至聖裔孔君
事以師禮同邑進士丁君皆出其門萬曆初以選貢
通籍赴銓未任卒子鵬翼能世其家子孫至今繁衍
且多聞人

丁君明字景薇萬曆癸卯舉人丙辰成進士考授中書科中書未任卒君明溫恭有局度俊雅不羣幼穎異于書無所不讀長遂博綜名理淹貫羣書下筆輒成名篇性寬和不以行能驕人人以此敬慕之敦古道尚氣節爲青衿時有同輩爲縣幕所辱明毅然鳴之當道以雪其恥自通籍後不私一竿牘雖所居寥寥數椽仍履素而行人以爲難事業未竟哲人云云識者悼之

韓可興字龍洲賦性靜朴秉心端方幼而敦敏善承

蔬水之歡長跼長兄請教至夜分不輟與弟可大孝
友相勉有布被之風鄉閭莫不欽其德門徒百餘人
教先德行而後文藝又誠子曰母微爾容母逸爾形
端其視聽慎其言動時惜分陰庶克有成閭里聞之
歎服應明經選爲漆園學博士子飲其和而樂其倣
焉上官廉知其才委代蒲庖百姓歌曰美玉晶瑩秋
月皓徹玉月易求明公難得遷湖廣天柱令蒲民拔
轅不得製行樂圖送至其家涕泣而去至楚化苛格
頑人人尸祝隨遷長沙別駕其于民也不以刑督惟

尚德化故其言曰坊表自樹夙夜不欺當世必有諒
之者况誠能動物推之無不準者乎壽六十五卒崇
祠鄉賢

韓可大號鳳洲少有學行懷經濟才善詩文好法書
以麟經教授子弟百餘人皆一時之雋與兄可興俱
稱文章宗匠少列黌序九試未售領歲薦授浙川學
博抵署日與浙弟子員博論羣書期以文正公做秀
才勉之文課不虛三載如初畧無倦意以疾歸浙士
祖餞鱗集扳轅而泣縉紳皆有郊勞贈賄亦以邑失

矜式爲~~限~~壽六十有一編幼學解以訓初學至今人皆爲法子成已孫能翊明俱庠生能世其業

李春英字涵萼幼聰敏以舉人授玉田令未幾以憂去補肥鄉令縣故多盜英下車集諸父老子弟訓戒勲懇有犯者論而遣之朞年荏苒無警士民胥慶循聲甚徹選授南戶曹出爲廣西桂林知府文武兼資經權互操蠻粵畏而愛之兩臺獎其才方欲題補蒼梧道決意致政歸享年六十七而卒通籍二十餘年恒謙抑不自滿子四人又新最知名

李又新字銘盤春英子幼聰穎長有聲藝林以明經授府佐儉以自居豐以待人傲儻負氣非公事未嘗入公庭善承親志隨父任玉田時以簿書政績頗容叅究其父循卓有聲新有力焉家居延師課子弟每講論至夜分不輟邊陲告警乃仗義從戎設伏制勝屢建功績擁節者錄而咨之銓曹方議用未幾病卒人咸惜之舉入鄉賢祠子青芝登丙子賢書城陷罵賊而死

李春華字秀實天資醇謹穎悟異常好讀書博覽文

章重于當世從遊者甚衆其訓諸生先德行而後文
藝不矜其才羞伐其能屢中副榜以明經授懷慶廣
文勤課藝談經史三載不倦甲第聯翩百年頽風振
于一旦至今接踵不衰後陞州學正明倫造士致仕
歸築室于城西五里許名其亭曰八卦引水環流遊
咏其間自謂羲皇上人著清語數十篇及砥鶚篇行
世崇禎辛巳城陷被執賊威以白刃毅然不屈時年
七十有五與長子衛經歷又彥次子太學生又毅相

被害

呂養正字太始廉靜醇雅遇人渾渾不見圭角咸欽
爲長者以孝友聞兄養化爲官事所累捐五百金以
助之由監生授掖縣丞民愛其仁號曰呂佛陞徐州
經歷致仕歸享年八十七卒子五人能世其家後嗣
繁盛人以爲盛德所致

李養禎字在礎少有大志端方不阿博覽羣書究心
理學以文章名世以恩拔授靜海簿上官憐其才獎
日百里豈大賢之路不移月而委署海令興利除害
清潔自矢海人稱之轉鴻臚典簿爲仇忌歸甘貧樂

道課子讀書談論經史竟夕不倦崇禎歲值流寇薄
城捍禦西城四十晝夜雖戎馬倥偬未嘗釋卷辛巳
城陷遂與子庠生正芳正莖同被害壽六十有八

黃家才字柱明自負不羣善談論與人交溫良謙退
由明經授天長訓導比蒞任視官如家日進諸生問
業其教先德行而後文藝長者勉以仁義少年導以
孝弟感而興行者甚衆觀風者嘉其品上之于朝遷
青城令其爲治嚴於馭役而寬於教民急於揚善而
勇於去奸青邑賦役繁重疲於轉輸京邊郊費以俸

給之民賴其惠天津米豆徵課甚急勒限確解止索
實收不使中飽雖嚴民弗怨也三年報政威化大行
其廉介如一日慨然致政歸居家儉約以周族黨時
葛久乏科第因詳其地勢倡建文昌閣于城東隅以
培文風而仲子朝薦卽魁鄉試其他相繼登第者數
人屢舉鄉飲大賓不赴卒年七十四崇祀鄉賢長子
朝聘死節次子朝薦成進士各有傳

路國士字忠明家有世德生而誠樸不事矯飾學博
才瞻總角卽列上庠屢試冠軍立身制行有古儒者

風仁孝天成事繼母以孝聞析產以田宅美者與二
弟兄亡撫姪不翅親育且誠之曰爾但無負爾叔我
亦無負爾父異日泉臺一面可歡然如故也持已肅
然冬不爐夏不扇一日燕居偶寐輒爽然自失曰何
不敬若是以恩拔考授通判改縣丞授濰縣職司鹽
軍於商引屯政悉心爲治邑有積訟監司令按之不
事刑罰痛發其情兩造垂涕而去名動青齊屯有隱
匿二丁四十餘年未清所司受累乃潛心搜索一訊
卽出其一丁無妻搦俸爲娶事及上聞撫按大悅交

章薦揚而適捐館矣享年七十有一素無疾卒之夕猶與子乘殷講通鑑疊疊不倦少頃端坐而逝子三孫六俱能世其家

李起號鳳颺天性孝友嗜學好古有盛名者四十餘年以明經授鎮平濟源二邑教授修學善教有功一時居鄉謙謹人皆愛慕之闖賊陷城被執賊詢之輿論咸誦其德遂釋之後累舉鄉飲大賓嗜養生家學年逾九旬童顏善飲仲子應運領歲薦諸孫皆爲一時聞人五世同堂壽九十二而卒

邢國璽字韞斯別號瑞石爲人厚重質直寬博有局
量生平言行擬古人自矢忠孝大節以至誠待人人
亦不忍欺癸酉舉于鄉甲戌成進士出宰濰邑其爲
政先撫字而後催科與民休息獨於探囊胥篋輩不
少貸常曰鼠竊不止必成嘯聚嘯聚不已必致披猖
秦晉諸寇滋蔓中州豈非殷鑒哉治濰浹歲道不拾
遺濰故土城捐俸甃石導水浚濠時羣盜蜂起鄰封
多失守濰獨巋然無恙轉戶曹視事草塲克其厥職
晉登萊海防兵憲攬轡海上專務寧民如與屯以備

一軍實練兵以資徵發懲大憝以剔奸宄禁贖銀以厲
官方恤郵傳以甦積困諸大政成績炳然壬午冬值
寇警晝夜拮据城隍備極勞瘁未幾奉部咨監軍入
援卽率部曲五千人抵省撫軍分所將之半衛魯衡
二藩復檄趣守登率數十騎而東道經龍岡突遇賊
鋒乃身先士卒逆力決戰始猶殺傷相當旣被重圍
刃鏃交加身嬰數十創墜馬賊見其狀貌知非常人
追之降因仰天奮呼罵不絕口遇害于臨朐之野會
解嚴尋遺屍幾不可辨季子爲樞泣血籲天俄跡舊

名箋暨諸文卷于疾風旋舞中又其地金光爍起得
綰髮簪焉因識父屍人皆以爲父子忠孝至誠之報
事聞贈光祿寺卿賜祭葬廕一子入監讀書崇祀鄉
賢妻袁氏死節見列女傳子爲法爲憲守城不屈死
後爲樞坐法遣戍葛邑竟無其後深可悼也

邑令何鼎痛其

一門死節作
長歌弔之

孟良屏字旭六性恬澹好法書領丁卯鄉薦薦其父六
旬始生屏先有螟蛉兄屏體前人意待之加厚財產
均分焉睦懿親周鄉黨好善樂教人尤敬慕之葛遭

寇亂屏激厲衆士分城而守屢摧寇鋒辛巳城陷與
貢生黃朝聘等同時被獲不屈死

黃朝聘字起莘青城令家才長子也好學攻苦少有
大志累試高第戊寅舉明經性至孝母病身侍湯藥
非親嘗不敢進及喪哀毀幾於滅性歲稔出資養士
鄰里賴以全活者數百人乙亥之變分守西城出奇
屢破賊鋒辛巳城破與守城人一特被執慷慨罵賊
死其時衣冠巷戰衝鋒罵賊而死五十餘人亦足見
葛之士氣爲名教之干城者也其有姓氏可紀者如

張範孔曹一俊張振翊武崇文李應賓侯璽朱之鼎
朱之燠李又琦李又培李正芳李正茂李紫芝呂蒙
修邢爲範邢爲法邢爲憲孫之昌孫麟定時運昌張
善法劉志允馮士髦張忠蓋張謙吉惜不盡傳也

國朝

冀養浩字景孟癸未歲貢生賦性剛直好義樂施其
周給貧乏扶持孤幼多不勝書明季遭亂避難河北
宗族百餘人俱爲土賊唐六等屠滅及亂後歸家邑
中被害雖多以其黨屬猶存尚有所畏浩奮身鳴

法司渠魁悉正典刑不惟爲宗族雪恨元遺毒之家
無不感激歷南陽葉縣寶豐光山儒學教諭所至文
教振興當事奇其才委署桐栢縣事教深惠政播頌
遠近惜其才未盡展以病卒于官士林悼之

路克陞字振九辛卯拔貢舉順天鄉試性孝友能
志侍父病衣不解帶者累月祝天願以身代居喪哀
毀不欲生盡誠備禮四方來弔者皆感之泣下兄弟
六人陸居三以已能自植盡讓財產與諸兄弟身無
所取勤課三弟俱成佳士又善排難解紛好義樂施

唐果元
卷之五
三
族黨賴以扶植鄰里藉以婚葬佳言懿行難以枚舉
尤殷殷以教育後學爲念至今人猶思之

黃朝薦字狄門青城令家才次子癸酉舉于鄉丙戌
成進士初任瀋縣令甫一載撫綏流離興行教化循
聲甚著調沅陵令遭病歸家幼擅異姿才高學博老
友性成父任青城時奉母于家母教頗嚴一日課不
中程痛自刻責杜門不出次年領鄉薦在母病不起
左右食不知味寢不解帶禱祈備至母臨終惟大呼
孝順兒而已奉繼母亦以孝聞兄朝務性蕭嚴盡孝

弟道卽登賢書有專必長跪以請命坐則坐命行則行不敢稍越禮焉及朝聘殉節孀嫂孤姪倍加撫卹教養咸周家居放情詩酒寄興林泉恬然自適而又樂施與如招寄食之族于遠方贖旣鬻之婦于康姓至若供泉掩骼之類美不勝書邑人感其德至今不忘子二人長光祚次光裕俱監生天資仁厚克稱象賢

尹奇遇字覺斯以拔貢考授通判改授山東按察司經歷處事精敏而能出之仁厚上官器重之署高苑

縣事值荒歉連歲民多流離徵調甚急不忍催迫呼
民婉諭之民感其仁而泣遇對之亦泣時有鬻子女
完糧考詢得情揮之去曰離人骨肉完我考成于心
何安卽以原銀給還令贖自是任檄雨催不復徵比
竟以催科政拙罷職或疑其在任半載徵解不無侵
蝕苑民扶老攜幼泣請于上曰荒亡之餘令不忍追
呼實係我輩拖欠令何與焉臺使亦深加嘆惜歸家
以淡薄自甘寄情詩酒與弟奇逢友愛倡酬人皆敬
慕之苑民至今尸祝不替